

求恕齋
叢書

雪橋詩話

十一

雪橋詩話卷十一

遼陽楊鍾義撰集

吳興劉承幹參校

提督花連布額爾德特氏由世職歷官貴州安籠鎮總
兵少時曾習左傳乾隆乙卯福文襄勦銅仁紅苗悉以
事委公大營日宴會或雜以歌舞時永綏城被圍八十
餘日公率百餘騎長驅直入破燬苗寨數十且戰且前
苗人皆烏合眾未見大敵遠相驚潰圍立解公著豹皮
戰裙苗人呼爲花老虎擢提督踰年禦賊山梁頭中石
墮入深澗中傷重歿於陣賜祭葬諡壯節性質直與人

交有肝膽畜駝羅驄馬飄瞥善戰云自西藏中所得嘗
索錢叔美貌之是日席上姚太守施總戎各爲一詩松
壺詩有云紫金盤陀七寶串雄姿尺幅開生面櫪下牽
來意獨豪營前騎出人爭羨萬人辟易戰士呼突圍夜
上山梁趨四蹄蹴蹋砂石裂項下髑髏如貫珠飛身擊
賊賊膽碎將軍新破松毛寨卸鞍猛氣猶奪人十萬降
苗陣前拜其驍勇神駿之意可以傳矣

宋于廷題張仲雅簡松草堂集句云未許草書求大令
同將蠻語識參軍仲雅爲侍郎映辰子梁文莊甥時令
辦潭參軍爲瞿木夫錢竹汀壻也輯有官印攷證吳郡

金石志

錢獻之年老病風行動需人尙能以左手作篆干廷題
趙億孫病榻倚肘卷子云曩歲錢華州右體苦跛倚自
號扁跳人日究六書理今我謁起居緙左病校此億孫
時亦負元晏之疾也已亥庚子閒譚復堂嬰末疾每與
隱几論文讀于廷長日苦支離終歲惜抱負之句爲之
慨然

鄧湘皋精醫術程春海視學湖南湘皋嘗下榻署齋時
爲太夫人診視春海有句云造膝每當交讓樹窺垣時
見一方人又答湘皋句云盡道有才過屈宋劇憐競爽

得王楊謂歐陽礪東礪東原名紹洛於詩持律矜嚴嘗
言作詩務苦吟戒自恕或屢改而不安則竟削之又云
作詩當自寫其胸中之天不期而與古合所謂非有受
於人忽自得之令人過一地遇一人必作一詩豈吾胸
中之詩哉湘皋少礪東十歲兄事之每有篇什輒相違
覆礪東遁迹沈冥春海按試至寶慶始一出與雙清亭
之會湘皋則門庭日廣於湖南文獻纂述亦獨多謁選
入都母兄雲渠築聽雨山房寓書引坡詩慎勿苦愛高
官職之意乃改教職春海題雲渠茂才聽雨圖云有季
有季阻京洛欲往從之足力弱燈昏夜闌耿不寐何當

風苦雨又虐一家氤氳尙岑寂旅人徬徨何所託遙知
客去酒尊冷獨立空階數寒柝季抱雄心未甘老思排
青雲奮長鏑公車不錄趙元叔虛想承明備著作州縣
之役徒勞耳不圖縛人適自縛何如歸來翦明燭臥誦
新詩起行藥百年奄忽有時盡留此白首相盤錯箕冠
欄且不復御收束黃鍾入趙鐸賤貧尙恃支離篋富貴
先愁紇干雀圖成寄弟涕橫下季曰進止仲引卻引卻
季進豈仲願不能肥季使季削誰知季心遠相印已揣
仲心守且恪深憎軾轍隔雲水久慕沮溺耕荒莫款門
忽到天涯季一笑西疇未渝約長牀大被枕資眠昨夜

雨聲殊不惡湘皋新納姬人春海次其大雪詩韻云人
迂王恭初著讐詩踰東野不言寒誰知妥竈蘇蘭役別
有青腰玉女官亦可見老輩風趣

姚春木嘗自稱海上白石生其論詩謂元裕之以後無
大家於明初推劉伯溫謂在高季迪上而盛稱管緘若
侍御所選唐詩以謂備正變具勸懲一一皆如胸中所
欲言自言所得則曰以諷諭爲主以音節爲輔以獨造
爲境以自然爲宗譚仲修於其所選 國朝人文深致
不滿越縵侍御則詆其一生祇知宗仰惜抱當與海內
學人共證之

張南山以詩見知於翁覃谿嘉慶壬戌舉於鄉以祖母
年老不赴會試丁卯戊辰寓京師覃谿詫爲詩壇大敵
每過蘇齋輒爲論古人詩源流異同疊疊不倦癸酉與
友數人於白雲蒲澗之麓築雲泉山館居焉覃谿爲賦
雲泉詩寄之云廣州城北雲泉館張子索我雲泉詩白
雲濂泉我未到八年吟望恆於斯先生乾隆甲申視學
廣東戊子留任辛卯
交遠追坡公訪信老自尋雲外泉出時近憶漁洋贈範
衲聽泉來叩安期祠百年前記蘇詩石石題亦勒崔公
祠我題粵東金石徧竟未訪得蘇崔碑臨別白雲若迴
盼又四十載詩夢馳詩翁逸客今選勝買地一攬雲泉

奇倚山臨澗結亭閣眾綠飛起珠江漪環碧之樓拜往
詰得非菊坡書室基蘇崔精靈尙來往且莫遠問秦安
期菖蒲笏竹雜澗翠木棉花風交荔枝他年蒲澗補山
志月坡雲逕連軒池重立蘇崔題刻石漁洋詩或鑿並
垂八年未到俗客耳我詩焉用疥壁爲澗香正發紫含
笑愧答僂鉢曇花師年八十至咸豐九年三月賦詩辭
世而題曰九月果以九月十八日卒疾時誦澗明詩曰
縱浪大化中不喜亦不懼蓋生當乾隆之季宇宙太和
至是海孽鳴張粵垣再陷盛衰之際其寄慨者深矣譚
玉生教授嘗謂壬辰科歛縣程侍郎來典試程淹博而

兼游藝多能者也榜後粵中名士醮集於雲泉山館酒
酣程慨然曰粵東今日可云盛極矣然盛極而衰天之
道也此後二十餘年亂從粵東起再過十年亂將徧天
下不堪設想矣時曾拔貢釗亦溺於漢人洪範五行之
學者與程往復程笑曰子無爲杞人憂吾與子不及見
矣隨諦視座中人曰及見者止譚子耳後五年侍郎卒
甲寅紅巾起曾拔貢亦卒丁巳以後內外交訌幾如陽
九百六之期而當日同席諸公早已物故惟瑩獨存其
事甚異因並記之

耐圃太常五子以蓮龕方伯繼昌仰山司寇鍾昌爲最

賢李香子感舊詩所謂雙鳳揚苞者也仰山能詩歌文學政事無不敏瞻愛士若渴戊子典試江南檢落卷得山陽潘四農蓋四農應鄉舉者十有二而後領一解以貢於京師與禮部試者六卒無所遇仰山嘗謂淮有三傑四農及李芝齡毛子喬至京則館之於家謂人曰四農乃吾師事也退食之暇唱酬無虛日和相廢園在海淀園中有樓向貯一自鳴鐘極巨晨鳴則羣姬理妝花神廟綠野亭尙存園池爲漁人利四農過焉適有盪舟橫笛者爲賦水調歌頭曰一徑四山合上相舊園亭繞山十二三里煙草爲誰青昔日花堆錦繡今日龕餘香

火蠶悔付園丁綠野一彈指賓客久飄零壞牆下是綺
閣是雲屏朱樓半卸曉鐘催不起娉婷誰弄扁舟一笛
斗把卅餘年外綺夢總吹醒悟徹人閒世漁唱合長聽
仰山負遠志希古不順時痛疾媵嬰小夫不出肝膽治
事坐是失要津隕絕域壬辰卒年四十八四農爲作家
傳

郝蘭皋戶部於爾雅用力最久字借聲轉名物疑似必
詳加辨斷所造較邵氏正義爲深癸酉之春迄乙亥之
秋以養疴輟爾雅之役瀏覽史籍撰晉宋書故宋瑣語
有資考鏡所著燕子春秋蜂衙小記亦敘次斐然配婉

任女史爲之料檢鈔錄其謂周禮雞人夜嘑旦以詔百官今京師夜漏二十餘刻後邏卒一人先唱眾人屬和其聲抑揚宛轉有音無字須臾徧傳遠近以警羣官蓋卽雞人嘑旦之意東坡說雞鳴歌云今來黃州聞黃人二三月皆羣聚謳歌其詞固不可分而其音亦不中律呂但宛轉其聲往反高下如雞唱爾與廟堂中所聞雞人傳漏微有似引漢官儀宮中不畜雞汝南出長鳴雞衛士候朱雀門外專傳雞鳴應劭曰今雞鳴歌也又引晉太康地道記後漢固始飼陽公安細陽四縣衛士習此曲於闕下歌之今雞鳴歌是也然則宋之黃州不出

汝南境界東坡所聞卽雞鳴遺聲讀太康記豈雞鳴歌
經泰始罷後汝南傳唱遺韻猶存顏師古不知而妄破
其說故東坡爲之置辨今京師聞此聲通謂之哈號蓋
亦不知卽雞鳴歌矣其說甚核曩在春明每遇坐班迎
送常聞此聲今則巢痕已埽宗稷都非清露朝衣悉成
華胥之夢矣

徐贇邨宗伯中秋月食金縷曲云碧海晶簾捲問姮娥
清輝須惜浮雲須遣幾點憂時菱婦淚迸作九霄露泣
星影散漫空飛繭此夕風光猶較可忍來宵素魄留痕
淺桂華蠹愁何展斗邊一角銀河顯怨無端投壺笑巧

南箕舌扁更怕寒芒分道出惱亂人閒雞犬天上恨嬋娟難免自有凌雲修月斧柰瓊樓玉宇非專典霓裳袖

阿誰翦此詞蓋爲順治十二年八月廢后事作

諭禮部云自古

立后皆慎重遴選使可母儀天下今后乃廢王于朕幼時因親定婚未經選擇宮闈參商已歷三載淑善難期不足仰承宗廟之重謹于八月二十五日奏聞皇太后降爲靜妃改居側宮見蔣良騏東華錄王先謙本未宗伯子元正工部尙書再傳至以升生開厚開厚生

天柱仍三世爲翰林天柱子卽飴菴副貢養原阮文達築學舍西湖上徵高材生數十人詁經其中與弟御史養灝與焉母程善鼓琴嘗自製譜因是研究音律據左氏管子淮南蔡邕之言謂上古聲自聲律自律本不相

準旋宮之法旋聲不旋律徵羽主濁倍聲琴弦次第定
以一弦爲徵又依琴弦辨正管色證後儒之違闕文達
校勘諸經注疏館巷任尙書儀禮儀禮錯簡脫文尤多
所校出永嘉濟陽兩張氏上問作詩歌有陶謝之致范
史所稱伏生之後世傳經學清靜無競非獨門族之盛
也

順德梁廷枏爲李繡子詩集跋尾於粵中先正自曲江
下引及鄭氏嶠雅而以大令繼之雖不免阿好師門然
繡子有讀杜韓筆記其於詩亦非率爾操觚者嘗宰昭
文故歲收漕姦民倚爲衣食藪懲治之則飾訴於上官

摺紳以寡交往故視之漠然也會交代以虧空免官繫
省獄八年旋嘉應阮文達留授諸子經取毛詩紬義著
錄所刻經解

李方湛白樓仁和諸生工倚聲詩如二月二日偕家允
升重游河渚看梅泊舟雲谿菴云鷗鳥見已慣復來導
煙艇遙山回春姿掩冉無定影花光水上來化作谿雲
冷濛濛染衣裳風香任人領清磬一聲圓茅菴隔畦町
白衲菴曉起同舍弟方洽云春山挾春雲浮動不自主
東風一以吹散作前谿雨雨止山依然風定雲更吐幽
人曉夢清披衣聽鳥語初陽尙未升山閒雲縷縷不知

身在山但覺雲滿戶均極瀟曠嘗寶一石攜以自隨名
之小石梁鐵梅翁爲作長歌賦之

武進湯緯堂少時嘗誦鷓鴣有飛近馬頭晴雪處立殘牛
背夕陽時之句遂以詩名乾隆丙午官鳳山殺賊捐生
子太學生荀業同日並命孫雨生都尉嘉慶甲子官揚
州守備奉母楊太夫人寓瓊花觀時年五十三一夕釵
斷爲年十四時從其先德官昆明所賜賦斷釵詩二章
世所稱斷釵唵節母者也王申以殉生平所爲詩甚富
自三十五歲其舅與夫徇節海外遂取舊稿畀祝融雨
生掇拾零章汪沅蘭夫人繪唵釵圖汪孟文錄原詩而

爲之跋詩云美便無瑕斷亦休曉窗宵枕夢悠悠於今
別有思親淚記與釵時初上頭鏡非臺已悟空門贈嫁
釵簪半不存三十九年千萬路鬢絲絲斷玉還溫釵作
竹節形張碩洲題詩所謂斷玉拚隨雲海爛貞篁不逐
秋心變扶頭回憶卅年初夢裏慈雲暫相見也雨生以
羽林孤兒積官至樂清副將乞病歸寄家江甯名所居
曰琴隱園癸丑粵逆薄江滸赴水死其絕命詩云死生
輕一瞬忠義重千秋骨肉非甘棄兒孫好自謀故鄉魂
可到絕筆淚難收彙葬母子慟平生積罪尤詩爲僕攜
出得傳謚貞愍性好詞翰善寫山水婦董婉貞子壽民

女紫春無不能文善畫洪北江爲緯堂志墓有云康樂
成童先驚得句孝侯臨命尙復賦詩葢臺匪蔓延時嘗
口占曰今日不知明日事他生未卜此生休舉雅俗語
爲儷句也豈知藏卞公之爪更有孫枝招正則之魂復
留文藻三世忠孝嗚呼烈矣

朱虹舫侍郎充史館提調纂修官先後幾二十年取魏
弱翁欲習知漢事李贊皇貴練習舊章之意因事繫人
成從政觀法錄三十卷女葆瑛適孔憲彝繡山作書自
製小蓮花室清課箋張石舟題葆瑛臨曹全碑句云名
箋親擘小蓮室好夢難尋對嶽樓對嶽樓艸繡山詩名

也嘗繪韓齋把卷圖編有闕里孔氏詩鈔曲阜詩鈔

嘉慶乙丑何文安殿試卷進呈在第四

睿皇帝謂筆墨飛舞拔置第三道光十九年與子貞太
史同科典京外試前此惟乾隆丙子庚寅劉文正文清
劉文定及青垣侍郎於詩宗少陵書法由歐褚以進於
右軍智永嘗命書全唐文御序晚年刻忠義堂顏帖汪
龍莊官道州時與公家齟齬汪莖者著盾鼻隨聞有碧
雲駮之謗不足憑也

黃霽青花儂曲云泥人最是二蕉後秋水明邊有斷霞
語有風致

宋于廷說尙書劉申受頗以爲是與王伯申論之則不甚相合于廷虎坊橋雜詩曰漆經非散佚北斗宿當中王肅詞難合劉歆說已通古文眞朽蠹大義付冥濛寥落塵寰裏何人識宋衷此本朝學派一大關鍵也伯申之言曰吾之學於百家未暇治獨治經吾治經於大道不敢承獨好小學夫三代之語言與今之語言如燕越之相語也吾治小學吾爲之舌人焉其大歸曰用小學說經用小學校經而已蓋前此經學皆主東漢多從事於聲音文字訓詁以讀經自註方耕宗伯喜談微言大義于廷申受皆莊氏甥推衍遺緒學者多言西漢龔魏

從而昌大之許鄭之風微而新周改制之說起矣

富察雲西宗伯貴慶由檢討升侍講嘉慶癸亥大考降
贊善向例滿洲翰林不升轉中允贊善遇缺專由外班
揀選至是奉旨嗣後中贊缺出先儘編檢升用其講讀
缺出應由外班者先儘內班之中贊缺用宗伯仍歸入
內班升轉工詩文塞上諸作人比之明七子善鑿墨曲
宴有所賜名其居曰賜墨樓賦詩紀事程春海侍郎和
韻有云班孟文章隨口就李邕精采隔囊知乾隆年間
取金元以來古墨碎者重造成挺印曰大清乾隆年長
春園精造得之者尤以爲寶宗伯嘗以侍讀學士預修

高宗實錄累官卿貳坐事謫戍二十五年九月恩詔釋
回賞主事道光二年充實錄館提調補通參復九列辨
論時事探本窮源雖入對不肯少祕人有勸之者曰吾
骨傲欲媚其何能以故宦途多蹉跌春海詩有絡煙方
法搏沙手尙憶堯書點鴈年及鍊形已歷三朝久守黑
渾忘一己私之句晚長容臺未一年卽乞病罷時郭佳
相國枋政不能安於其位也結廬於祕魔厓之陽有山
居雜詠年七十餘卒

楊忠武由偏裨游至建牙年甫四十須髮半白每追賊
著草履緹繩而上平滑縣賞男爵殲捕南山賊晉一等

男甲戌入覲召見於靜明園

仁宗謂卿與朕同歲年力富強將來如有軍務須爲我
獨當一面張格爾者逆回霍集占之孫也猾黠善惑人
居喀什噶爾邊外安集延界白帽回歲斂錢託商人攜
往給送參贊大臣宗室永芹自道光二年莅任稔知其
事欲捕之會有言張格爾潛入某回莊者永芹令辦事
大臣巴彥伯克圖往捕至則無有疑回民縱匿誅索急
被戕張格爾遂擁眾戕兩副統並糾結安集延生布魯
特圖回喀城是爲六年六月喀什噶爾和闐英吉沙爾
葉爾羌先後陷沒忠武時權陝督借武駿亭中丞爲參

贊與薩爾圖克文襄公三路進兵七年三月復喀城四十餘日克英葉楊誠村時爲前鋒亦恢復和闐公所薦也張格爾復收餘燼伯克誘之詐以內應除夜潛至卡倫有備不克入八年正月生禽張格爾西域平仍督陝甘如故公子海梁制府時亦巡撫河南父子開府十五年晉封一等侯予告魯通甫詩苦憶西川楊少保十年長劍倚崆峒河山信誓君臣契關洛旌麾父子同百戰威名資坐鎮三朝禮數絕諸公當時恩遇兼終始不獨雲臺第一功駿亭名武隆阿瓜勒佳氏

陶文毅嘗注陶靖節集於嘉定建震川書院並求歸太

僕後人爲奉祀生訪求湘潭陳恪勤公後裔爲置祭田
東霧山在湘潭縣西南昌山之東上有東岑菴恪勤讀
書於此山下卽其先宅薨葬故山方靈皋爲書賜碑恪
勤東霧山詩云路自中峰上泉從絕頂分曉窗明海日
孤磬落松雲水木知先德湖山話舊聞桃源欣聚族吾
亦事春耕東岑禪院詩云層巒環積翠寶地闕東岑供
佛峰成菜談經石似林廚香窺鳥下鉢淨伏龍吟襪被
三年夏山寒每不禁

鄂松亭哭戚蓉臺夫子口占十首有云堯夫陳說傳朝
右陸氏裁詩滿案頭郭禹居廬原報德侯芭起墓爲酬

恩蓉臺洗馬四歲失怙母蔣太恭人以女紅佐生計延
師課讀每夜自塾歸令背誦所讀以爲常長以孝聞官
翰林提學貴州直上書房道光九年遭太恭人喪次年
八月卒松亭在庶常主其家習詩賦其獎掖後進懃懃
不倦松亭詩所謂三霜教養百計裁成非虛語也母喪
未滿一年子恆十九歲相繼殤故有地下有人能事父
天涯何處可尋師之句

嘗見林文忠京師日記一冊丁丑正月初二日重華宮
茶宴以歷代帝王名臣圖像聯句初四日五鼓詣乾清
門爲翰林院具奏經筵題目欽點四書題我亦欲正人

心易經題理財正辭禁民爲非曰義 上親製御論午
刻發下卽敬錄知會直講官果益亭少農秀楚翹少寇
戴可亭宗伯汪瑟菴少宗伯十七日繕經筵御論講章
二十日赴翰林院署換寫經筵講章廿三日改書經筵
御論廿七日黎明赴文華殿演經筵禮廿八日五鼓詣
文華殿陳設御案講案上御論講章是日黎明 上御
亮轎至文華殿經筵講官及聽講之六部九卿俱在兩
階旁跪迎 上升御座各官在丹墀上行禮畢分左右
入殿內聽講滿直講官先就講案用清語宣講四書講
章漢講官繼用漢語宣讀畢 上用清語宣講四書御

論諸臣跪聽聽畢滿大學士跪贊諸臣起立滿直講官
乃就講案用清語宣讀易經講章漢講官繼用漢語宣
讀畢 上用漢語宣講易經御論諸臣跪聽聽畢漢大
學士跪贊鴻臚寺奏經筵禮成諸臣出殿外行禮畢

上入御文淵閣直閣事及校理檢閱等官俱在月池旁
侍班 上賜講官及聽講諸臣茶皆跪飲畢 上還宮

諸臣赴文華殿東廡與宴奏樂八章畢恭繳御論講章
於奏事處二月初九日閱邸抄知李許齋方伯之事欽
差熙少寇昌王副憲引之赴閩審辦三月初一日知汪
稼門制軍引疾開缺調理董觀橋中丞擢閩督五月廿

五日閩省欽使奏到有 旨汪制軍革職永不敘用涂
太守擬發軍台實屬輕縱令軍機刑部另擬欽使亦議
處廿八日知王南陔中丞照議褫職六月初一日松相
國條奏以天氣亢旱明年 聖駕勿詣盛京奉旨降都
統戊寅年正月重華宮茶宴以盛京土風聯句廿七日
翁覃谿先生逝世二月初九日有旨於十三日大考翰
詹十三日卯刻赴乾清宮考試欽命題澄海樓賦以故
觀于海者難爲水爲韻以義制事以禮制心論賦得鑪
煙添柳重得煙字五言八韻十四日午後見等第名單
列三等二十九名十九日赴圓明園引見候述旨此文

忠未補御史以前日記也道光壬寅公以督部戍邊路
出西安留兩月博爾濟吉特桓靖公時官西安參將始
以子錫纘厚安見公公手臨皇甫誕碑一冊與之厚菴
爲刻石於陝乙巳公入關攝總督勦番命厚菴繕奏章
庚戌九月力疾奉詔討粵西賊未至卒於潮州厚菴輓
詩四首云遂初未賦璽書殞盡瘁三朝力已孱大事艱
難誰可屬此生治亂本相關鈞天遽下巫陽詔劫火橫
飛象郡蠻知與不知齊墮淚旌旗慘澹鳳皇山龍沙萬
里戍伊涼曾迓高軒賦短章絕域功名悲定遠眉山父
子託歐陽軍容細柳看持節幕府蓮花有瓣香若使漢

廷充國在先零敢復掠河湟八漢曾傳長史師敢書狂
草醉臨池正心自有誠懸筆墮淚難忘叔子碑此後猶
將崇世享向來原不以文爲一篇大雅崧高什無限生
民沒齒思感愧交縈寄苦吟哀詞未敢託知音八年自
負陶鎔意一世公無醉飽心海國圖曾傳粉本魏默深
據公四
洲志爲海鐵圍山半有棠陰最傷社稷臣難得不在平
國圖志

生恩遇深

姚石甫望谿端硯歌望谿舊硯端谿石紫光潤臆方徑
尺中有微凹漬墨痕想見淋漓濡大筆國朝文章公最
殊驂駢似並歐陽驅 聖皇知遇亦已極爲公特免全

族誅白衣猶與承明直

世廟時容參密勿伉直不顧權貴驚聲名況已傾同列
有文如公不修史當時相國原同里竟遺班固識崔瑗
太息鄂相臨川李摩挲公物如見公文章憎命千秋同
我正含毫得此硯會看吐氣如長虹讀此詩當時張鄂
兩公之優劣自見雖鄉里後進亦不能稍著曲筆也

張翰風字畫道厚其古詩錄較稽留山人所選陳義廣
博詩道爲之益尊李申耆稱其精於輿地天下阨塞形
勢條析中事理所爲戰國策釋地其贍義也楊誠村嘗
延課其子暇則談軍中事隨卽記錄頗翔實飛動官山

東十年有政聲

馮柳東句云疏林短塔知城近落日晴山壓屋低姚梅
伯句云當風帆溼猶疑雨入晚天暄漸減衣皆善于寫
景

朱芟堂嘗館嘉善謝金圃侍郎家盡讀其藏書性嗜金
石手摹復齋款識全冊與趙次閒之琛同摹積古齋款
識其秦海上嘉月鉅詩云琅嬛仙館得古印如磬矩折
形橫奇文曰海上嘉月鉅篆體頗類鐘鼎彝璽書璽節
稽昔制秦山梁父封禪遣黃金白玉螭虎紐璽屬帝王
炎漢儀秦印金銀銅犀象曰璽上下皆同之變文作鉅

泉脾社字乳穀穀孳生孳載考史記暴秦末後人秦嘉
稱武師秦時浚邑濱東海斷爲嘉鉞夫何疑祖龍旣死
四海沸夜狐一呼羣雄隨鸞飛鳳翥咸陽寶金神不守
將母危郊下一軍自孤立連營百里喧鼓鞞甯君公孫
作羽翼倉頭狙狙豺熊熊竹符安用奪郡守赤鞞那待
頽影頤磨刀矯殺武平畔大司馬印鑄金龜景駒楚立
張楚敗將軍握節麾旌旗武都紫泥何處得亂鈴羽檄
紛交馳此乃私印作鼻鈕蟲魚不仿丞相斯青琅玕折
珪琬角紫鞮鞞畫泥沙錐筐中似掘曰窠石象形合挂
珊瑚枝斗檢封制古如此說本北海非余欺洪鑪何物

同凍鑄或者戮戟瞿矛鉞彭城方與往來道腰佩曾不
須臾離一朝事去天不祚旂常竹帛無勳垂居巢亞父
佩將印祖其意立看羊兒重瞳匹夫何足道印刻自敝
空爾爲真人豐沛提劍起金章一櫃收遺規子嬰蒲伏
上神器越刻繆篆侯王宜大黃威火收璽綬老婦擲地
角亦虧獨此闕銳實無闕千年碧土黃落滋轉入大雅
吉金錄紅沫觸手生春姿抗衡斤權嘉量寶追陪日觀
琅邪碑原父恨少先秦字得此摩弄應嗟咨同時雞石
布縷輩豈無肘後懸纍纍因人作事卽錄錄公等乃其
鱗之而銅花銅葉日零炙北邙衰草嗥猩狸亦有成師

磊伯鈺倉籀點畫拳蛟螭冥漠君與子虛子我縱欲說
難爲詞勝梁岨起此鼎足名不剝蝕神護持頂顛劉蹶
頃刻耳鈺乎鈺乎知不知書堂觀玩發浩歎一彎明月
悲秦時在文達幕課讀時作也其先世多善梅竹有春
橋者工山水並設色花卉多方購求遺光滿室暇則對
讀事設色道光戊子以後但用墨法

董若雨名說後爲僧名南潛有豐草菴詩集蠶豆詩云
誰賦田園雜興題琅玕記取夏初垂喜看桑底新懸莢
恰值蠶眠未吐絲細雨賣茶聲過後竹煙燒筍火停時
沙瓶添榼分前詠豌豆今逢第二詩

自注誠齋蠶豆詩有沙瓶新熟西湖

水漆欄分嘗曉露餘又言蠶豆未有賦蓋豌豆也吳人謂之蠶豆姜西溟曰吾鄉以吳人蠶豆爲豌豆而以吳人所謂寒豆者謂之蠶豆至今猶然見湛園札記

上元孫韶蓮水在阮文達幕

賦瓢兒菜云嫩葉如瓢飽露華白門佳種勝黃芽鉗當顏巷三秋晚來趁吳帆一幅斜小雪時光人中酒故園風味客思家使君淡泊甘如許海玥江珧未足誇二詩頗相似

沈匏廬題彭士望樹廬老人文集句云義熙甲子題猶恨德祐庚申紀獨詳題明開國功臣信國公遺像云偶符茅土文丞相孰翬雲臺馬伏波詠蘆花云容被寒生初解襖兒衣暖去不盈箱守真定作常山貞石志其河

朔訪碑圖則權大順廣兵備道時作也

兵部有祠一閒向祀楊忠愍公明崇禎時金忠潔公爲
車駕司員外甲申三月視皇城聞京師陷慟哭入朝知
莊烈帝已崩解牙牌北向四拜投金水河死見亭河督
官駕部時請於長官一併入祀有詩紀之

竹樓督糧觀瑞爲索綽絡文恭從子嘗官粵東之文昌
調東莞其從兄梅林自盤山來出所爲詩曰挂月山莊
詩存竹樓爲之跋其詩清和沖澹不失東村家法竹樓
庚午舉人亦能詩

鄧懈筠尙書妙吉羊室詞高陽臺闕當指林埃邨查辦

鴉片煙封艙繳土之事詞云鷓度冥冥花飛片片春城
何處輕煙臺膩銅盤枉猜繡榻閒眠九微夜爇星星火
誤瑤窗多少華年更那堪一道銀潢長貸天錢星查恰
到牽牛渚歎十三樓上暝色淒然望斷紅牆青鸞消息
誰邊珊瑚網結千絲密乍收來萬斛珠圓指滄波細雨
歸帆明月空舷

吳仲倫論詩句云平生只作詩人了昌穀還他第一流
其論書論文皆從容於軌格之中不事凌厲永福呂月
滄從問古文義法自浙歸主桂林書院粵西人始有爲
桐城學者世居宜興五渠里明世諫張叔大奪情名中

行者其遠祖也

昆明戴筠帆嘗修昆明縣志因寫陝山載筆圖陝昆明
縣境山也行經鞏縣訪杜少陵墓不得云杜陵歸葬地
壘樹接嵩雲異代空相訪遺封了不聞邛山此松柏洛
水自榆枌怪底都成迹悲吟下夕曛此地原公里依人
慣遠游乾坤衰旅鬢襄漢阻歸舟自入秦中感難銷劍
外愁浣花谿上月江水羨東流稷契平生志空憐老大
身艱危思弟妹喪亂感君臣兩泣空山夜風驚故國春
耒陽誣醉飽唐史爾何人南嶽魂應返東風恨轉平古
今幾窮士天地此詩名我亦悲同谷茲來叩洛城摩挲

雙眼淚重和醉歌行鄂松亭序其集謂由三唐溯漢魏
深觀潛玩歷三十年不倦其由邢臺趨內邱句云煙光
橫大陸雲氣接中條雪中過滇南勝境坊云地形規左
界鄉夢劃中原格調均極亮特

程春海鬼車嘯有感一友云天畔笙簧旋其聲清且圓
方士聞之喜欲顛云有仙樂迎吾前九首復九尾厥狀
怪且詭兒童聞之振犬耳云有黑祥將降矣徵諸古童
謠鶻兮更鴉兮久雨必西鷺久晴必東棲載鬼盈一車
其說無所稽徒以八音繁會十胆奇耳目之內紛見疑
如何尙作摩雲嬉勸爾潛形伏海島無使吐哺相公懟

妖鳥此詩所指不可確定必當時名士也龔定菴釋言
四首之一云東華環顧媿羣賢悔著新書近十年木有
文章曾是病蟲多言語不能天略耽掌故非匡濟敢侈
心期在簡編守默守雌容努力母勞上相損宵眠二詩
疑一時作程所謂吐哺相公龔詩所謂上相當是蔣襄
平龔詩作於丁亥襄平相國正在樞府

姚石甫遣悶詩好鬥千年自越風無端蠻觸又相攻青
宮保傅新承寵也抵將軍定海功益嘲孫平叔也道光
六年以臺灣餘匪悉平加太子少保

顧南雅通副一字吳羹號湘湄高祖澹園公茲長洲諸

生有聲復社居蘇郡之碧鳳坊肄業紫陽爲錢辛楣所
賞拔道光初元松文清由謫籍起總憲復出爲熱河都
統君疑有閒之者兩疏爭之由侍講學士降編修十年
復擢侍講學士謝恩之日上書陳西域事宜以爲逆回
滋擾不難鉏慝於目前而難弭禍於日後請於喀什噶
爾一帶添設重兵控制安集延俾回人不敢窺伺且其
地密邇英吉沙爾葉爾羌和闐皆有水草可以耕牧宜
募民屯田以備戰守更慎簡諸臣無分滿漢務得讀書
識大體者畀之此任以廉靜寡欲通達事理者佐之必
能萬年無事龔定菴詩云漢朝西海如那縣蒲萄天馬

年年見匈奴左臂烏孫王七譯來同藁街宴武昭以還
國威壯狗監鷹媒盡邊將出門攘臂攫牛羊三載踐更
翻沮喪可以見當時西事敗壞之由朱文定嘗謂翰林
以記載文誥爲事委蛇棲遲率可致尊顯君獨勤勤懇
懇以建言爲務雖遭擯斥不少悔比之汲黯朱雲書法
在歐陽率更張伯英閒晚年乃一於褚登善手書小楷
學庸孝經至數百本閒畫梅蘭宋于廷碧雲盒詞有潘
紱庭屬題南雅畫梅卷疏影一闋

廣西有秋風烏爲魚所化龍城最多梧江亦有陸綸漁
鄉莞爾詞有玉人歌詠之蘋洲白漾皺縠微茫撇波鱗

坼網絲斜罽翦羽逗輕碧蠻雲饌品當筵省冷色圍秋
幘賭翩翹影瘦清江駿風無力買向小蛤隻認蛤蜃形
移雅箋須釋碎點紅糟鄉製巧摹得較他半翅龍堆遠
骨脆應渠惜句霜霄泥酒柔尖同擘漁鄉當湖人詞多
體物之作蓋瓣香浙西六家者

汪小米結東軒吟社屬費曉樓爲之圖蒼所作爲清尊
集自號借閒生國語漢書均有校正配梁端無非有列
女傳校注可與福山王婉佺注竝傳

湯文端在澄懷園以水蓼花根爲杖名游龍杖一時題
詠甚夥其去位以薦林文忠失旨時郭佳相國不欲用

兵英人既不得逞於廣東則東陷定海南絳廈門北至
於天津事連不可解朝議遂歸咎於首發難之人王文
恪至以尸諫疏卒遏不可上文端面奏被嚴飭退仍具
疏切陳卒不安其位致仕居京邸

文宗嗣服潘文恭杜文正交章以文忠應詔而文端不
復出矣

紅帶子莘農相國伊里布瀛舟筆談稱其政績廉明在
滇與阮文達規隨畫一有懷文達詩云老境爭禁又別
愁心知況是其蠻陬琴樽數日違如此膠漆三年樂易
投南詔嶺雲遮驛馬夜郎山翠接邊秋深虞築室謀無

據北望旌麾日上樓又挑鐙對雨云細雨廉纖晚未晴
暖風入夜漸成聲怡顏散步行長廡悅耳忘眠對短檠
荷沼水深魚躍起薜花階濺鶴驚鳴來朝去看郊原潤
馬過村村笑語迎詩筆亦復俊逸道光癸卯卒諡文敏
明錦衣千戶張怡鹿徵甲申後獨身寄攝山僧舍躬樵
汲不入城市鄉人稱白雲先生著有三禮合纂方望谿
嘗爲作傳馬沅湘帆白雲祠詩云窈窕荒祠仍舊宅慘
慘喬木倚寒筠君王自衍魚龍戲天地能容蟻蝨臣南
國衣冠元祐黨西山薇蕨義熙民白雲空繞江乘路誰
薦桃花湖底蘋

張誦風祖蓀圃先生少家貧嘗藝秫稻以照讀年十五
受知於夏醴谷學使以背誦諸經入學年十八索綽絡
文莊公拔置第一令讀書晉陽書院時牛階平主講席
逾年從階平之河中代階平者爲胡稚威復盡受其學
旣成進士選任歙縣斗山亭者明湛甘泉講學處也禮
請劉耕南爲士子師因闕間政書院鄭炳也游問政山
看桂小集斗山亭有天爲斯文作宗主魁杓聞已屬張
星之句所注陸宣公翰苑集引邑人程易疇汪稚川在
湘方睇原參定並成平定州志攷誤一卷庚寅爲江南
同考官時灘韓夢周理堂以蝗災被劾將北歸贈詩有

雄談君仍昔鐘鏞將陶匏博物收金石箸述芟葦茅之
句壬辰遷合肥程蘭翹學士讀書縣齋甲午除壽州重
建循理書院延亳州梁聞山爲之師戊戌冬擢泗州壬
寅乞終養子曉泮編修嘉慶戊寅典試福建道卒誦風
善言地理一意著述隨黃羊司農校藝江蘇阮太傅時
家居見所著稱爲碩儒有蒙古游牧記延昌地形志顧
閻年譜靈石楊郎中尙文刻連筠篴叢書禮庀其事嘗
題齋曰身齋室曰洵雷俞理初何子貞王棻友陳頌南
何秋濤皆與訂交推爲祭酒惠邸慕其名懸榻以待者
三年卒辭不赴自題小棲雲亭云余家陽泉山莊爲金

棲雲道院元遺山詩所謂開窗納山影推枕得谿聲者
也有亭翼然高出林杪浙人張君世榮榜曰臥雲先大
夫及余兄弟皆嘗讀書於此每欲易臥爲棲以先世舊
題未敢輒更也茲余卜兆京北雷家橋宜丁阜地隸昌
平以圖經攷之卽金章宗之駐蹕山也山陽有棲雲嘯
臺章宗嘗築亭於其上兩地嘉名適相結葺而此閒峰
聯遼碣流帶玉泉山影谿聲較之鄉郡一隅規模爲濶
遠矣因擬它日結茅墓田之旁顏曰小棲雲雨眺晴耕
徜徉終老余之願詎有侈於是者哉書此爲券并繫以
詩其詩云野亭築得小棲雲種黍無錢亦可欣

香山詩
欲作棲

雲計須營
種黍錢

蓑笠喜酬西塞願

頃余作煙雨歸耕圖

松蘿休勒北山

文翠併畫影欄前涌玉瀑琴聲枕上聞依舊吾家好春

色

陽泉春色平定八景之一

觴花吟竹更誰羣鹿牀居士為繪小棲

雲亭圖卷

誦風述懷感舊六十韻為老友安丘王母山先生壽

初七日

云總非出見客談論儼成人詞館舊名輩賞我氣

不馴會稽舅氏行

莫寶齋先生

宏識鏡人倫講德扶根奧聽

倦客欠伸勿眇欣有會請辨恆斷斷賞我具夙慧汝器

天廟珍

身齋文集山西所拔貢生先君受知最深比入翰林遂為主婚以李太夫人之姪歸先君先君

見背公迎先繼妣於家穆因

得受教誨諭獎進有逾子姓九載困鄉井凶喪丁一身

穆自癸未夏侍母西歸奉諱家居
庚寅仲兄歿壬辰正月始復入都
囊穎時一露激歎不

逡巡斯時意氣濶章句未肯循
高心躡姬妣世儒陋轅

申新安亦父行程春海厓岸頗
嶙峋賞我文錦爛妙誇

女手鶉侍郎贈詩有云詎知鶉兮手文錦薦美珏俞君夥大儒精博蘭陵荀

客邸一解后過從輒頻頻跟踵
偶別異相訪荒江濱己亥

春理初訪我於江陰許君起日照
家法浹長遵視我十年長蛩巨

兩相因此外尚二三交際亦云
醕最後得安丘投分俞

許均又云俞君倏云亡白門送
歸輪庚子夏理初卒於金陵惜陰書舍

許君迫飢驅涉上臯比新年來印林掌教甯漁山書院閉門輦轂下

秋鴻弗我賓安丘時示過閒隔
無兼旬自言賦性狷未

能涇渭泯老年結新歡相仗如戈種再拜銘君貺敢復
判畦畛惟君六書學析理猶析薪桂氏達神悒多歧非
通津段巖稍識別大路仍莽榛契悟所開豁達慎未敢
臣學山學夫岱導江導自岷築室始平地樓觀俄連闔
曷櫛根大木寸銖彙百鈞說解十四卷研尋三十春未
及俞之大已兼許之純小學貫羣籍顛極君實臻毋山
辛巳舉人著有說文釋例說文句讀等書六十後出宰
鄉甯權徐溝再權曲沃故篇未有行復將作吏小試膏
雨郇之句印林專精許鄭何文安視學山左拔貢成均
嘗爲潘芸閣校定史籍考爲楊墨林校刊桂氏說文義

證所著有韓詩外傳刊誤攀古小廬文稿

游盤山者立中盤定光塔後北望自來峰外則平谷縣

城如在几席李寄雲侍御墓田在平谷三寫平谷山莊

圖合為一卷石舟題詩有云盤山三盤幽可探山陰宛

若江之南繡壤豁開流泉甘中盤北面雄關三黃厓將軍及屠

庸而三洵河左合盤谷水素湍積波沿谿潭語本鄭亭浸潤山

陰成沃土土宜稼穡桑宜蠶定光塔頂游夢酣自來峰

接天蔚藍侍御善繪事精鑿藏宋畫香山九老圖卷舊

藏其家越縵堂詩所謂遼陽侍御富緝軸愛護不使纖

塵污者也黃鶴山樵聽雨樓圖藏南海吳荷屋中丞家

丁酉人日雪程春海招客飲龍樹院中丞出示此圖侍
御有摹本石舟題詩云字勒筠清館圖傳黃鶴樵春宵
雪媿媿用程序語記聽雨瀟瀟南海歸裝渺西臺畫筆超神
思偶相契不復事規描又有爲李寄雲題大癡江山勝

覽圖詩

君子館爲漢河閒獻王建以招賢者見水經注在河閒
縣西北三十里與肅甯縣接壤苗先露始得此專石舟
爲作君子館專歌云先生嗜學眞古人詠經寫韻恆斷
斷斟酌毛鄭得其醕一擊天獎汲古勤又苗先路寒鏡
訂韻圖卽送游沛南云絕學溯原始才老初鉤沈又越

六百載魁儒出亭林五書初印布天漢光珠參吾友勤
藁學力殫稽古忱十部稍恢廓七韻新酌斟乃於江段
書攻辨戈鋌森寒鐙耿獨寤館樹巢文禽聲諧意彌愜
一笑形諷吟先路嗜六書形聲之學爲學使沈鼎甫侍
郎所知舉辛卯優貢生何子貞嘗命工圖己及石舟先
路三人貌篋笠而處田閒蓋三人皆同年優貢石舟詩
所謂邨谷有三友廿年占益簪也嘗以顧氏音學所立
古音表十部猶病其密而戈麻旣雜兩音不應別立一
部於是并耕清及蒸登於東冬部并歌戈於支脂部定
以七部爨括羣經之韻于古音部分全行變置不免武

斷其游沛南以馮展雲視學山東曾文正薦之偕往也
咸豐七年卒年七十有五

覺羅雨舫中丞句云大雲沈夜壑微雪點秋衣殘燒遠
無燄斷冰行有聲海陽趙秋客比部句云虎過秋山響
鷹盤野樹高海濤連北斗山勢聚東萊天津樊質夫縣
丞句云路折千峰峻天垂大漠圓其寫景皆非大河以
南所有

端木子彝舍人阮太傅謂之青田一鶴臣家二首紀嘉
慶四年大處分也其留別劉鷺初云西笑相逢憶古歡
驪駒催唱且盤桓入關師自因盧植被褐交誰得并丹

歲暮河梁人結髮天涯風雨客加餐黔山漸水東西望
容易相思識路難送別知君倍黯然團團心事到尊前
生兒羊祜雙環少贈婦秦嘉一鏡圓黃犬家書通萬里
碧雞春夢隔三年何時共挈蓬山侶不住天南住日邊
頗饒情韻

道光元年祁文端以編修入直南齋應制賦太液清泛
詩受知

宣宗由是至宰輔未嘗一日離南書房孝友清德篤於
故舊嘗從陳石士受古文學視學吳中得景宋鈔本小
徐書登諸版程侍郎遺集及張誦風苗先麓諸人著作

多所助刊在樞廷排艤湘鄉世以此少之而盛推費莫
文端公文慶之相業焉

翁文端巢經巢詩文序云往時歙縣程侍郎以博聞強
識負重望嘗典試嶺南所得士如番禺儀克中陳澧長
樂溫訓皆有時名先後與余定交京師儀君工詩精攷
據惜早世不竟其所學陳君天才雄駿於書靡不窺近
乃服膺許鄭溫君治古文詞力摹韓柳於近人不亞憚
子居然皆弗能爲侍郎之文其能爲侍郎之文者遵義
鄭子尹一人而已子尹故侍郎視學黔中時所矜賞者
也生平研精三禮習聞古宮室冠服之制通聲均訓故

之學爲文章古澀奧衍大率如先秦以上諸子汲冢墜
簡兩漢碑版文字及馬第伯封禪記之屬腐儒小生讀
之或至口鉗舌撝實則真氣流貫莊顏爲魁紀公家言
者古近體詩簡穆深厚時見才氣亦有風致其在詩派
於蘇黃爲近要之才從學出情以性鎔蓋於侍郎之文
爲具體矣黔中惟子尹與莫孝廉友芝張副貢琚黎訓
導兆勛傅孝廉景數人爲能肆力於古而子尹所造尤
深此序於子尹淵源所自言之犁然文端亦嘗親奉程
侍郎之教上下其議論者也子尹丁酉選拔貢生出侍
郎之門

宜黃黃樹齋司寇少以詩名入翰林爲御史與歙徐廉峰編修寶善益陽湯海秋戶部鵬建甯張亨甫孝廉際亮用文詞詩歌相推厭於亨甫標榜尤甚謂嘉道以來作者未能或之先也姚石甫亦謂前明以來閩粵詩人無過鄭繼之屈翁山者近惟亨甫最爲傑出亨甫屢困南北試更名亨輔至乙未乃獲雋其金臺殘淚記南浦秋波錄抑塞無聊之概可知矣越縵堂則譏其詩極粗率蓋全不知此事者不知當時何以得名如此張碩洲隨園詩云童癡喜述袁絲句博涉頗嫌風力欠褒題之濫不獨松寥一集也

費莫文端爲朱玉存侍講壬午禮闈所得士玉存倅直
三天疊司文柄尤留心文獻所輯國朝古文彙鈔與吳
枚菴文徵相亞以汪太宜人病乞養歸不復出前後主
鍾山暨正誼紫陽書院二十五年在吳中結問梅詩社
與石琢堂吳棣華韓桂舫彭葦閒董琴涵諸人迭主敦
槃時巡撫陶文毅承宣使梁萑鄰皆同年生朱文定卓
文端並爲寓公玉存與諸公及顧南雅吳棣華相倡和
續滄浪七友圖丁未重謁泮宮有詩紀事庚戌卒年八
十有二

文康鐵仙爲費莫文襄公孫孔修相國弟由潁州府爲

駐藏大臣非其志也拂鬱牢騷窮老無俚至爲章回小說以寄意然文字甚工其史梅叔詩序尤佳

滇楚雄池籥庭司業生春與李卽園明經戴古村上舍楊丹山司馬戴筠帆給諫稱五華五子皆宋芝灣詩弟子籥庭直南書房凡五年督學粵西卒於任嘗於樵湖之北朶榕湖經舍延呂月滄掌之以經義策論詩賦課士臨桂唐子實劉蓮丞平南彭子穆馬平王少鶴皆所選高材生朱伯韓詩寢門風義猶行古嶺表文章待起衰爲子穆少鶴示池學使輓詩作也

許珊林校勘笠澤叢書手寫付梓錢輔宜學博謂樊榭

山房西湖春雨絕句遙峰隱見黛眉攢怪底春來無此
寒朋比熏鑪風味淺有人樓上泥闌干正用魯望春寒
賦中朋比熏鑪留連黼帳相逢置酒則少避醜顏獨自
登樓則偏淩遠望語珊林從宋本改朋比爲明滅似不
若朋比爲勝其記姜白石詩說謂姜白石詩存者寥寥
而擇翁少宗伯謂爲南宋一大宗以其皆和平中正之
音也讀昔游詩可見其大概白石放浪江湖與陸魯望
同而無魯望憤時嫉俗之談友人有喜效魯望以怒罵
爲文章者余不謂然也亦思魯望所處之時何時耶白
石道人詩說謂三百篇美刺箴怨皆無迹當以心會心

又曰大凡詩自有氣象體面血脈韻度氣象欲其渾厚其失也俗體面欲其宏大其失也狂血脈欲其貫穿其失也露韻度欲其飄逸其失也輕余謂論詩固然論文亦何獨不然又曰思有窒礙涵養未至也當益以學讀此知詩有別材非關學之說不足爲定論矣學博論學均以平澹爲主以廣貢爲海甯訓導者近三十年曝書雜記多自得之言足以啟迪來學

吳縣許兆熊鳧舟少從同里徐友竹游工書畫篆刻中年營生墾於池上村築草堂藝菊其中取宋韓見素詩焚香修菊譜之意成東籬中正一卷沈文起爲池上菊

賦張之自趙宋以來世盛僞史志道范致能二譜國初
陸秩昭種菊槎谿王石谷爲繪圖以傳秩昭因著藝菊
志並題詞刻之乾嘉閒吳中殷富士大夫家爭致奇花
異卉以夸客鄧尉之梅天平山之桂拙政園之山茶往
往見於歌詠而光福徐氏之菊亦並著焉文起書尾云
昔陳羣立九品中正以裁量人材定爲銓法宋明帝好
圍碁南史稱其嘗置圍碁中正鳧舟於翰墨之暇與圍
官攷覈精粗汰俗存雅爲陶公補此缺事他日藝苑更
留一佳話也其賦云水魚尾兮清漣山磬頭兮平遠上
下洞之居東西讓之屯

集韻杜本切

一竹當門七松爲榭玉

斧之孫于焉息偃心太平兮坐忘窩安樂兮行坦陳局
露初攜琴星晚廚分調水之符寺送借經之版梅亞月
而吟殘鶴廳風而夢穩坊琢玉而禽和集聯珠而花卷
討春則睡草布莎休夏則坐魚侑醜辭戰秋而勳策管
城課餘冬而雲吹粉本朝暮之風隨人今舊之雨滿眼
此固聾叟之山棲可略於退士之筆宛也則有女兒之
秀可餐甘谷之流不散含五美而擣詞當九秋而開宴
餌玉筍之方榮把東籬兮獨棍癖有甚焉興真不淺于
是招谿老以載苗督園官而除瞳榮橘奴之羨緝補梅
妻之空窾馭穎兮机莖煙腴兮雨瓣劇土分盆汲泉接

篔簹絲筴兮縛杷薤菜尊兮糞裝殊彙同莠詭名異撰
馬塍乞種於姜夔花街移根於朱勔庚辛之戶徧訪丁
卯之莊無屨風月平章之餘朱紫中正之選干叢茂於
羅含百璧勤於陶侃既而天隨之葉已莎子美之蕊堪
撚潔酪奴以自勞鍼酒魔而引滿效山家骨董之羹具
老圃盤游之飯依韻會白居易詩用此韻雅思北郭之盟不覓南鄰
之伴乃來告曰翳橘香兮酒熟將抽豪兮授簡一束之
贈久要重陽之會再展余乃泛搖碧之齋造來禽之館
蘋黃白而帖罇樹丹青其成繖時則秋露初乾朝曦正
眼驚爛漫兮滿庭紛萎綏兮布碗確蘆薹熒梯黃蘗焜

埴塤煊燐英鱗鄂扶

都滿切

濯四照兮玉榮鑠五光兮金

鈇銜朱蒂兮脣櫻醮紫蕤兮霞綏麩筆鬢鬢兮若鳳帚
之將簪綢蹙蹙卷兮如松釵之交辯鬢注的而小妍鬢
步搖而高顛蓋香東墨西所莫喻而批紅判白所未辨
焉酷郁魂魂繁馥纂纂吹蝶夢而霜蘇颺蟲絲而風喘
聞秋樹而吐幽掩素屏而流眇泛金盞以橫波錯銀釭
於盛鬢穠銅井之餘青澹吳淞之一翦霞繞髻而成臺
煙橫眉而迎輦相看黃葉之邨遙指白雲之巘俛瘦影
於涼蟾抱芳心於密繭試銀葉而微磨恐背鐙而偷泣
迫寒夜之相憐慰窮秋之如洗遂乃烹伏雌於雞棲擘

尖雄於蟹斷貊炙韓羊三弋五卵招紅友之久醅卷白
波而一灑灑竹葉之墨六續松明之鐙續嚼數斗兮既
玲瓏插滿頭其猶繾綣此樂何極斯游殆緬其追汐社
之朋簪兼漫莊之文苑乎主人應曰唯唯吾子之歸緩
緩方撰澤民香圃之圖繼良輔金歌之款子其抒情於
芷秀藥華滌筆於冰甌雪椀媿原博之報章軼潘尼之
繁轉然而張百杯之興易窮溫八义之事都嬾雖酬鄧
牧之古琴終媿江淹之禿管文起沈博淹通昌黎荆公
石湖集皆有補注居木瀆

管異之嘗著擬言風俗書籌積貯書洋貨議皆按切時

弊以立言洋貨議者以自中國與西洋交易洋貨日至
皆奇巧無用而中國之財安坐而輸於異域其蠹國病
民爲害甚深因著議以爲欲謀人國者必先取無用之
物以置其有用之財故表餌交關互市之事古之人常
致意焉洋之樂與吾貨其深情殆未可知就令不然而
中國之困窮固由於此則安可不爲之深慮也程春海
句云有盡兼金傾海去無端奇貨挾山來當時士大夫
皆知數十年後必受其敝也

趙琴士二十應童子試受知於朱笥河手授以許氏說
文且爲言讀注疏日毋過十葉讀說文日毋過十字必

精造乃已遂專意考訂矻矻終其身尤深於史著通鑑
注商新舊唐書互證兼工書畫旁及於奕嘗輯生平師
友詩爲蘭言集

蘭汀郎中那興阿故尙書蘇楞額孫有園在西淀 園
明園南四里淀人稱曰蘇園龔定庵詩云蘭汀司空孫
華年擅朝譽勳戚邁百年風煙喬木故貂褕馳朱輪而
不做韋布兄弟直明光車蓋灑曉露瑤池侍宴歸賓客
雜鷗鷺有園五百笏有木三百步清池足荷芰怪石出
林櫨禁中花月生天半朱霞曙黃封天府酒白鹿上方
胙詩壘挾談兵文場發武庫收藏浩雲煙屢鼎不參預

金題閒玉躩發之羨且怖讀罷心怦怦願化此中蠹羽
陵書畫籍對此不足簿蘭汀蓋亦風雅好事之士定巷
寓蘇園五日臨去爲題水流雲在卷子

包慎伯嘗謂詩文有由選本得者有由全集得者由選
本得者塗逕窄而詞句淨由全集得者詞句雜而塗逕
寬見王西御秋蓮子詞題識

朱伯韓與蘇賡堂陳頌南號諫垣三直咸豐十一年杭
州再陷伯韓死之有怡志堂詩文集楊雨巖孝廉自軍
中歸云粵雲指畫氣縱橫匹馬親覘灞上營自謂將軍
有揖客未妨衣褐作狂生抗言款寇非長計急借前籌

要汰兵太息吾謀適不用蕭蕭塢水獨歸程
相州道中云又向鷓鴣澤畔過馬蹄隱耳繞坡陀
荒亭日暮征人倦平野村稀古樹多
暝色蒼蒼連衛郡秋聲黯黯起漳河
淒涼鄴下無耆舊欲訪韓陵柰遠何
同時梅伯言在師友閒故所作亦頗相近
其尊人韞山司馬鳳森知瀘縣時滑縣賊起
守城有功民立廟祀之道光朝伯韓疏陳
義利之辨反覆數千言張石州題韞山詩墨
有辨賊孤臣今有廟建言嬌子久無家之句
蓋其詩結句我有衮師嬌養慣謂伯韓兄弟也
伯韓數上章陳大計留中亟告歸里比粵賊起
家居團練鄉兵會賊將張家祥募

義歸羣帥疑而未敢許也伯韓識其忠果可大用以全家保之後爲將死王事卽張國樑履堂名廷魁高要人旅懷句云眾鳥儘知高樹託名花偏愛後時開頌南爲陳左海高第弟子丙午歸晉江潘季玉集同人餞之右安門外誠氏園頌南詩先成一時和者甚眾季玉因繪圖以永其事石州送其還里五首之三云侯官再起用總制關之右朝命初下日賀者額以手給事奉嚴議讒毀中彼婦朝命同日下惜者不容口賀者與惜者意甯區薄厚或爲蒼生幸或爲當道醜八琅瑰傑多林陳今稱首行矣尙愼旃侯官更誰偶庚戌朱文端以林陳並

薦仍授言職文章樸茂淵古既蹶再振卒亦不達

成廟中葉天下承平久疆吏習於寬大多因循自安獨
東阿周文忠自州縣官開府用法嚴峻任勞怨無所顧
避初任懷遠調阜陽有劾其殘酷者命蔣礪堂相國查
辦奏言天爵愛民如子嫉惡如仇與陶雲汀先後疏薦
鎮淮楚治尙威猛以鋤強去莠爲務會上從鴻臚黃

爵滋之言禁鴉煙遵奉令甲厲若雷霆犯者立置重辟
豪貴皆側目而視未幾竟中蜚語落職躬耕自給親與
其子磨菽江龍門嘗入湖北佐理鹽筴其秋興詩云漢
廷厚重惟周勃屈指安劉屬此人對簿苦煩刀筆吏歸

田老作葛天民 聖朝究信心如水良善方知氣似春
聞道兼葭秋水外臣年七十尙精神洪秀全亂金田起
廢籍撫嶺右不能久於其位咸豐二年勦匪潁州卒於
軍龍門秋興又一首云開通道路起騁驩一旦浮沈水
上鷗黃霸未聞重奉詔李膺何日更同舟迷離夢寐猶
青眼破敗功名易白頭殺賊差強人意思左遷巴蜀又
經秋則爲姚石甫作也

潘伯寅師嘗謂本朝河南祇兩通人一武虛谷一蔣子
瀟子瀟治經宗許鄭方言音韻地理算術無不條貫洪
符孫序其詩謂其密於學拓於境嘗攬海岱駕伊涼南

條北條之水太華空同賀蘭之山鄂爾多斯厄魯特之
人皆足以盪胸襟抒志氣瓜爾佳東屏中丞豫山從其
甥馬佩玖得所撰卦氣表游藝錄廬山紀游西征述四
種刻之湖南其醉來一首云廣廈長裘意已疏文章報
國更談虛深源詎繫蒼生望韓愈猶懷宰相書西極屯
田煩將帥南中民力盡河渠醉來調語關經濟腐氣豪
情兩不除馬季長石室句云罪疑時論在師法自君亡
可爲定案

嚴子進從子駿生字小秋上元諸生有養花吟館詞風
蜨令題紅豆調嬰武圖應聯玉農司馬屬云鬢影羞花

見眉痕感鏡知手拈紅豆出簾遲調逗金籠嬰武背人
時舌巧頻偷語心靈慣弄辭須防觸恨說分離記取相
思兩字莫教伊玉農名聯壁西林相國會孫成哲親王
壻亦喜爲長短句故事郡主薨壻再娶則奪額駙故玉
農祇以進士官知州潤峰相國成邸孫也辛丑以揚威
將軍出防寇隸麾下派同吏目濮貽孫赴鄆探敵情過
慈谿後山北見富民葉沈等姓團練鄉勇給之曰若等
自保固善然不能得功不如帶赴軍前吾爲若稟則事
成可邀議敘費此鉅資爲有名也從之玉農遂報自募
鄉勇八百人今帶來聽調將軍命玉農管帶仍發回後

山北以備用及甯波兵敗各路南兵皆裁撤此隊因實
額故獨留日向糧臺支口糧恐人之發其私也請變名
鄂雲鄂雲者玉農鄉舉時榜名也積五月得餉銀二萬
金有密友在江甯欲謀寄頓乃請急挾資往適英人犯
長江道梗三月未得返初貽孫稔知其事玉農亦深結
之請假時有暫託貽孫管帶之語貽孫遂稟聯某久羈
江甯應發鄉勇口糧不敢擅向糧臺支取惟私自借貸
給發今計時已久應共一萬三千餘金情願捐輸請議
敘將軍方憂經費不敷得稟深嘉之卽入奏迨玉農歸
怒與貽孫互訐適本旗以玉農出京時未經奏明謂爲

逃旗行文押令回旗事始解貽孫尋用知縣而葉沈終
不得上聞詳見貝子木咄咄吟自注管異之送聯司馬
序惜其中路一蹶引疾以歸勛之以忠信謹度有旨哉
當玉農與異之小秋益山高會時在嘉慶二十二年九
月玉農年正少異之所謂賢相之孫名卿之子連嫺天
室年二十而官五品文翰之美輝映乎當時聽訟折獄
之才雖老吏自以爲不及爲題鄂文端臨米帖冊子欲
其繩祖武而兼厥盛乃困心衡慮之餘卒不能謹度而
行謹慮而語當從揚威南下時度已五十之年竟以貪
敗可慨也異之卒於道光辛卯不及見其末路之披猖

矣

姚石甫謂王悔生廣文灼詩文高古惜翁之外最爲老
宿其感懷詩有云大江孤艇曾相見南海荒煙尙有書
已負文章千載事不堪重問子雲居石甫在臺灣晦生
有書以文章之事相期望也管異之謂大雲山房文集
動於篇中署憚子居曰四字意甚以爲不典憚氏孤學
無師無足怪悔生從海峰游今其集首孟獻子論亦自
署王悔生曰悔生文專學海峰其序事頗有佳者此則
不當律令古人著書必自稱名易大傳論語諸書則每
篇稱子其始蓋門人所記錄而沿及周末則著書無不

自子者矣其在古未必然也然以周人創之則其例可用唐宋人文柳子厚稱柳子蘇子瞻稱蘇子王介甫稱王子依仿古書其稱爲有據若夫字以表德出於朋友之相呼論語記顏淵子貢云者大抵他人所載述古人著書必無自標其字者也其於古文義法謹嚴如此與劉明東同學亦議其不守師訓而奔走公卿形勢朝上一書以求名幕進一詩以鑽利而於其詩文辯博馳騁光氣發露不可掩遏則亦未嘗不歎爲奇才而以蹤跡之疏爲恨也

宗室陳芳外史豫本

初名
毓本

字茶村恭親王常穎裔孫綏

遠城將軍晉昌子薊生相國文恭公先德也有選夢樓
詩鈔移居題壁句云近市鮮魚煩入饌比鄰甘井況宜
茶先排竹徑安楸局便埽苔階位石鐫吐屬清雋其書
異域瑣談後云紅滿花跗綠滿枝番風應候不曾遲清
明煙柳晴偏好第一愁人是雨絲郎種平田歌插秧妾
渠春水放湖塘語郎莫去青青草好借芊絲一味涼金
絲爲帽錦爲鞵夾道抽刀雜控弦滿酌蒲萄新釀酒一
鉤初月照新年路滑冰山不可尋羊腸九曲似郎心爭
知妾有纏絲意抵過千尋雪海深入則將臨禮拜忙女
兒先自浴香湯可堪寂寂空牀夜一月清齋似太常笙

歌喧送不辭遙錦帕娉婷上馬嬌巧結珠囊新絡髮紅
絲相映一條條雪花如掌暮寒天捕得蟾雞味劇鮮爲
與箇儂雙臉似就中單愛雪山蓮角射平原鼓細搗招
攜高處踏春華不知著意新妝樣何似輕盈刻紙花伯
斯塘上惜餘春桑落嘗時夏景新薌澤乍聞宵漏徹阿
誰能作獨醒人山頭綠石磬聲圓南北山清好著鞭莫
待漫漫青務發御風眞擬賦游仙落日平原百草枯射
生何事待張弧迷離撲朔誰能脫識得渠儂絕技無錦
帕頻迎阿葛橙紅妝比比豔盈家底須大小分三婦同
是春風姊妹花郎祈微雨妾祈風變換天工指顧中但

是陰晴皆滿願一孟新水試深紅平沙浩渺細渠盤客
子無愁行路難下馬徑須先覓飲一闌干接一闌干回
疆風土麤獷而點染一出以雅淨亦自可誦

鄂恆松亭伊爾根覺羅氏先世自吉林保送來京國語
所謂三音哈哈者譯言好男子嘗著家傳一卷丙戌庶
常累官侍講癸巳兩上封事一言北郊無遣員代一言
天津水師防海置無裁撤會大考再屈左遷詹事府再
遷工部丙辰以員外郎改陝西知府至陝遽卒厚安都
護其受業甥也編次遺藁爲求是山房集詩三卷文一
卷厚菴謂其耽於酒醉輒誦書史聲震耳好作擘窠書

或徑七八尺黃鬚怒張腹皤目炯炯仰視不合者輒謾罵縱談古今天下事留心治亂卒年五十六其題柏靜濤少宰同年使朝鮮日記云我清運啟榆關東無國不受天朝封懷德畏威二百載荒荒海外同球共何與接壤最恭順首屈朝鮮十八公按歲貢獻道相望征東堪笑唐太宗厚待外藩聖時特每有慶弔隨時通歲在甲辰建寅月請唁李氏煩臣工帝曰欽哉汝稜往破格之用唯清衷拜命丹墀遠行邁皇華四牡歌靡靡到處爭來看星使紛紛白髮攜黃童肥馬輕裘豈吾愛館人授粲無他供蕭條行李一寒素大夫母乃標五總路出臨

榆得游眺樓登澄海停花驄長城保障尙遺阯天開海
岳碑穹窿萬古洪濤渺無極瀕瀕溇溇濬兼沖融前走鮫
鱗後鼉鼉琵琶擁劍交相攻厥類老蜃更奇詭飛樓千
尺高凌空訇轟巨響起波上晴天丁甲鳴靈窟洞庭張
樂詎其比移情我與成連逢雲中恍見衆仙下金支翠
羽光濛濛曉日扶桑目欲眩天吳涌出珠玲瓏初平漸
側忽起立鏡圓出火鉦懸銅三島十洲混一色琉璃陁
變珊瑚紅飽看溟渤莫爲水從此奇氣增詩曾過都越
國輒成詠五花璀璨縈筆鋒洗盡鉛華韻清越鏗然月
夜聞山鐘來往六旬百篇就錦囊旣溢還詩筒傳鈔價

貴洛陽紙班張豈必歸太沖南探禹穴北汶泗龍門自
序文章雄欒城閱歷在高大黃河之水華山峰兩間萬
象入懷抱方能落筆奔如虹不出戶庭欲學古小儒固
陋徒雕蟲持節東行抵朝鮮舉國敬迓威儀恭宣示綸
音國王感西向稽首頻呼嵩自道小邦竊安治扶持全
仰彤廷功似茲微事辱天使泉臺銜結皇恩洪少宰應
對推第一動容中禮皆雍雍觀者堵牆歎且服知人則
哲惟九重此邦老宿景文望魁頭露紛來趨風海外乞
書亦快事肯因道路辭疏慵平頭奴子奉端石爭磨元
玉煙浮松中書聽命客卿舞符蟲及篆紛橫縱須臾力

埽數十紙蒼茫絹素飛蛟龍
鞞堯柯櫺久失法君真則
昔能追蹤更有大節令人佩
四知遠匹關西翁五千贖
儀彼將敬我非陸賈金何庸
再辭再卻使者哭微官不
職王難容勢不得已僞相
受首將此事陳法宮臣心如
水帝簡在煌煌天語執厥中
屬貶儀曹傳來使一介不
取堂廉同此事此請足千古
早付剗劂雕杉桐願播土
林示後世以爲我清使臣佳
話永永垂無窮詩筆浩泚
亦自不凡

伯蒼孝廉慶霖爲章佳文毅公孫以蔭補官比部不得
與禮部試與鄂松亭太守以詩相雄長癸卯病中手錄

詩本屬漢陽黃文琛海華點定明年伯蒼歿馮魯川從
其弟子厚所攜歸咸豐元年鈐版光緒十年錫厚安刻
松亭遺集并屬伯蒼從子立庭都護鄂禮重刻松閣閣
遺詩時余館立庭丈所爲之校字僅據稿本未得馮刻
也嗣從海王邨書攤得原刻本並於魯川文集中鈔得
所爲伯蒼哀詞擬從與立庭先生補入詩鈔非久而立
庭丈下世遂不果刻伯蒼與松亭交最厚松亭以女字
伯蒼之子小蒼而詩境較松亭爲淵邃王萊友嘗亟稱
之其雜詩四十八首得比興之旨非苟作者也獨坐意
有寄凜凜懷殷憂朔風徧四海白日光西流歲時不我

待萬事良悠悠悠悠傷我心誰復爲身謀其二氣遞相

待泰極否之始百憂積胸臆鬱鬱何時已至計駭俗聽

大言驚里耳眾人昧遠圖彼蒼如可恃風霜亦已勁萬

象變清徵其二義農日以遠雅志難具陳汲汲朝歌叟垂

釣清渭濱白日耀清晝素月含精神日月互萬古光景

常鮮新如何天壤閒無復昔時人昔人卽長寐今人充

嘉賓今人異意氣昔人結比鄰其三去日苦不少今年非

去年日月遄邁征義馭無停鞭天地無窮期人生得幾

何歎此百年內憂患常苦多大造何茫茫怒焉心如擣

雌雉雠山梁時哉以爲寶其四達人壹生死志士無古今

卽境獲妙理夷險在一心少壯不可恃百年積分陰明
鏡照華髮空悲歲月深獨行謝徒侶高蹈出陸沈守拙
不希遇自賞空谷音五其空山采芳草美人在天涯區區
誰與歡寄興託幽遐幽遐不可覓望遠空咨嗟咨嗟亦
何益冰條吐寒葩陽春時雨潤桃李皆穠華悠悠澗底
蘭何如路旁花六其豔色世所求美人天下稀令顏在空
谷窈窕自光輝白露被蔓草素心忽相違游子在天涯
涼風吹我幃卷幃不能寐徙倚開雙扉仰觀時序變晨
景將熹微別離令人老舊事今全非盛年不可恃抱恨
空自歸七其幽居閱眾甫理舊情日新芸芸貢天機碧水

游錦鱗撥琴一再鼓甘露清且醕妙道本無方至理何

所因功成不吾有沖氣合鴻鈞其悠悠漢江水轟轟朝

雲臺金碧何輝煌階梯何崔鬼神女被麗服顧影獨徘徊

徊襄王夢思苦元感託良媒歡愛能幾時千載成寒灰

行矣宋大夫何事常悲哀其張陳刎頸交意氣傾八表

一旦不相合交親棄中道哀哉成安君血膏原上草安

得管鮑賢歲暮常相保其麒麟人不識曠代推其祥一

朝見魯郊鉏獲大路旁眾犬狺狺過飛鳥不敢翔子車

何足怪徒令夫子傷其十世人競明哲猛士懼喪元賁

育豈壯夫陳傅何足論白起小豎子威烈揚中原男兒

奮奇策結髮酬深恩終賈志不遂悲風落英魂

其十趙

王求將種趙括能言兵長揖謝萬乘揮袂出都城驕將

輕強敵深信無匿情長平隱危機殺氣薄太清哀哉北

邊將殺身名未成

其三

十曠達遠俗情獨坐適眾妙物理

入我心息息皆元奧放懷覽三古怒焉中心悼事過陳

迹留悲哉誰憑弔海雲知龍吟谷風聞虎嘯壯士無完

軀深謀無小效不見任公子海濱自垂釣

其十

愁思不

可遏結帶出西郊出郊見四野四野莽蕭蕭矯首望閭

闔天門隔重霄長空鬱雲氣浩浩流驚飈人生誠寄客

百年若相招功業竟何有河漢聲未銷造化理固然誰

復爲松喬

其十五

大木數十圍根柢何牽連上蔽白日輝

下蔭數畝田巨蛇穴其中鴟鴞鳴其顛密葉隱深霧鬱

鬱如雲煙嚴冬不黃落經霜反澄鮮何時縱斤斧矯首

望青天

其十六

兔絲日滋蔓縣縣離松柏柔條附大樹同

蒙膏露澤青陰蔭疏翠生理兩不隔嗟彼孤根草風霜

何相迫

其十七

凡鳥據高樹所志求苟免營巢得佳蔭養

羞亦豐腴引吭不敢鳴斂翮不敢展一鳥得所棲眾鳥

聲婉轉鷹隼竟無用空拳廢然返

其十八

西山隱異鳥矰

繳不及施毛羽未豐滿潛棲高樹枝一朝忽健舉飛飛

上瑤池翱翔不可制啄我千年芝鳳凰在東海胡爲獨

不知其十劉累參神龍梁鴛馴猛獸使彼山海姿依依

來相就順性委所貪龍虎在郊藪牛羊失芻牧煢煢誰

在疚其十一養松當養心翦草當翦根天霜殺寸莛枯萎

何足論春雨日以時悠悠滿高原大造無容心高原多

蔓草蔓草不可圖爲計應宜早惜哉青樹枝女蘿來縈

抱縈抱結不解忽忽令人老其十二牆下不種桑池中不

漚苳循名不責實象龍能致雨茂草何離離秋風下蘅

杜嘉穀秀不實蕘稗登樽俎世人昧貴賤何論桃與黍

其十三天地有大利粟實民所歸地道不愛寶萬物皆光

輝空中有鷺鳥翱翔下太微哀哉百鳥肉不供一鳥肥

豈不欲遠舉飢餓不能飛

其十二

秋氣正肅殺瑟瑟霜天

開征鳥厲九霄鸞皇獨徘徊徘徊將何之長鳴悲且哀

飛飛過東海一去何時回

其二十四

鬱鬱望邊城蕭蕭開廣

莫羽檄西北來天驕肆毒虐陳湯斬郅支威烈振沙漠

詭遇豈足矜虜情非困弱所以邊徼民至今思衛霍

其二

五駕言發憇嶺憇嶺高且長熊羆過我側虎豹伺我旁

奮身涉危險下馬古戰場驚風吹曠野千里何茫茫僕

夫慘無色恐懼氣不揚男兒樹奇節委身在邊疆恩深

性命賤取義非慨慷雄劍有利刃駿馬脫長韁撫僕起

嚴駕英烈名遐荒

其二十六

雲中有仙人飄飄凌紫煙左右

佩珠玉被服麗且妍瑤池王母宴桃實忽千年雙雙紫
鴛鴦青鸞飛聯翩羲陽亦已沒望舒不再圓歡娛會有

盡中心獨愴然

其二
十七

空谷有佳人窈窕生輝光媒氏致

六禮來升君子堂永言琴瑟御鐘鼓聲鏘鏘顧盼接悅
懌靜好無違將豈不被盛寵恐懼心未違顏色有時改

君恩豈常在君恩如日月妾罪如山海所以戒旦賢常

脫簪珥待

其二
十八

陽和難久留陰氣日以廣白露浩秋節

涼風吹宿莽萋萋百卉腓駸駸歲月往空谷歲寒松孤

高還獨賞

其二
十九

終日山谷閒采蘭不盈把貴此馨香時

遺我同心者故人在天涯欲往無車馬相思不相見憂

傷瞻夏野

其三十

獨立會千古浩然傷我神自昔數賢哲

凜凜常苦辛顏淵在陋巷原憲不救貧孰知窮困中其

樂自有真君子貴守節誰復計屈伸

其三十一

萬木冷無色

冰雪封深林松柏挺蒼翠大壑含幽深始知直榦中而

有歲寒心子期謝人世伯牙碎玉琴君子守本性精誠

銷黃金百年如一日涕淚霑衣襟

其三十二

人生在天地懸

鼠飲大河嗟彼無已人所求何其多多求苦不足陸海

騰洪波百年倏忽過身死將如何

其三十三

行行邱墓間下

有昔年人朱顏委黃土榮名隨飄塵遠林素雲結遙岑

悲風振蕭條古原外落日悲千春吾身非吾有何況連

城珍莊生重齊物胡乃役吾神其三薰風布德澤膏雨

何霏霏疾雷震羣動萬物揚明輝秋氣變肅殺淒然忽

寒暄歡樂不及時飄零將怨誰其五貴賤豈有定交親

見始終生平重氣誼四海瞻高風夙昔共言笑兩心無

異同忽已久別離故人乘飛龍相思在夢中夢中觀君

容堂上青玉案廢下胡青驄青驄嘶向天我心獨忡忡

其三魯連蹈東海嚴光竟垂釣子建多哀歌孫登善長

嘯七國日龍戰炎靈困羣盜慨自黃初來怒焉增怛悼

人心日以澆深情託厚貌大造愚羣生真機迷奧窔既

乏賢聖姿徒鑿渾沌竅至道欲一言下士乃大笑廣成

去已久此理終元妙其三豪俠動高會一飯千黃金美

人被紈綺光豔生華簪當筵進美酒度曲發清音歡娛

苦日短白日忽銷沈綢繆竟良夜落月照橫參獨有雍

門子挾瑟淚霑襟其三我自帝庭來九天清且穆廣樂

振太和雲霞散清馥試為奏一曲聽者去何速靡音動

路人和歌正相屬誰適起哀靡千秋元古復其三騏驥

挺神俊顧影何矜驕平生萬里心悲鳴聲蕭蕭壯志思

猛將捷足追盤雕伯樂不一遇駑駘揚金鑣荒原久廢

棄力弱骨不銷所以奇傑姿魂魄感燕昭其四干將氣

騰霄牛斗夜耿耿幽閉三泉下鋒芒透清迴沈埋幾千

年精光尙彪炳盛德卻令名錦衣襲以裝悠悠行日中

疾走不離影

其四十一

南山有元豹霧隱七千年一朝上高

岡文彩何蔚然不見千鈞弩林中機正懸彼豈好殺傷
愛此花斑斑象齒世所貴安得常萬全況負天下姿能

不爲之歎

其四十二

白鷹隱大澤雙目炯金精楚王獵雲夢

凡鳥爭先鳴金縑何炫曜玉鏃輝弓旌奮擊自有時豈
爲狐兔生扶搖幾萬里側視天空青大鵬不相遇斂翮

無所爭

其四十三

鬱鬱陵上松馥馥山中桂赫赫曜通衢深

深開甲第飛葢壯崢嶸丹楹隱峻麗揚眉上華堂高宴
席錦罽行樂及良時山河同帶礪出門問路人無人飽

麤糲其四十四東方有奇士被褐常不完閉戶守詩書心苦

志彌堅羣鳥飛向天翩翩厲羽翰豈無好羽翰進身良

獨難其四十五斥鷃亦得意啾啾鳴藩籬鸞鳳在九天顧視

無凡姿竹實三千歲俯仰啄瓊芝朝翔蓬萊島日夕棲

瑤池耳目不經見阿閣在何時其四十六浮雲西北飛白日

已夕冥日暮道里遠游子獨長征幽陰蔽天漢不見招

搖星泰山豈其大深谷為高陵大海納眾流焉知渭與

涇伯夷執高節千古聖之清其四十七螻蟻識陰雨微物通

機先習習涼風起四野鳴寒蟬仲秋既已望陰精耀中

天白露漸為霜馴至層冰堅冰堅自有時水寒亦已久

狂夫寄世閒踽踽常無偶豈其好獨行所思千載後深
心託微言功名孰不朽

其四
十八

伯蒼從武進費耕亭游多才工楷法耕亭孫西蠡同年
嘗出示耕亭先生詩卷有伯蒼題識數行矩度森然無
乾隆以後書家習氣伯蒼尊人瀾止故能書自謂其書
法從騎射入悟嗣出征西域歸而所學益進伯蒼楷法
與瀾止取徑各殊而心閒氣靜理密骨遒力存古法不
事奔放固波瀾莫二也程春海極賞其書伯蒼哭程侍
郎詩有云嘗見賤子書謂世鮮能匹每於公卿中稱道
不遺力余爲西蠡題耕亭詩卷有書摹宣示表誅得敬

通詞之句指伯蒼題識而言敬通謂馮魯川也伯蒼詩
世尙有知之者其能書則無人道及故特爲標舉於此
黃海華與胡東谷書謂今日事勢學士大夫無人不皇
皇作衣食計非天下之細故也此憂世語非憂貧語道
光初年煦齋協揆長農部已有綜計天儲十年後或不
繼之語蓋自乾隆四十六年裁撤武官名糧添給養廉
建議者因庫藏充盈不思久遠之計自奏準之後未必
能禁止天下武官不復役使兵丁而驟添此項養廉百
餘萬初由耗羨項下給發繼因耗羨無存遂致動用地
丁正項國家經費有常一年百餘萬三十餘年計之卽

三千餘萬其時阿文成卽有數十年後經費不支之奏
嘉慶三省之役舉舊帑七千餘萬而空之餉不足於是
開事例兵不足於是廣召募迨至事已而兵存兵存而
費存以及河工蠲振度支外所出豈可億萬計嘉慶十
九年以後兩次裁汰兵額僅萬六千餘名自乾隆五年
耗羨歸公各省耗羨掌於戶部耗羨之入旣列爲歲額
其出也卽定爲歲常取快一時罔顧後慮當國家豐亨
裕大之時民間財利充衍淮南則因事獻納司權則竭
誠奉上取之惟恐不盡用之不留有餘天診人事偶有
不齊國與民俱受其困道光辛卯壬辰之間江浙等省

大水發帑振卹備極支絀至十八年海疆不靖庫儲益
虛司農束手款議決以割地賠費傳教通商爲結果

宣宗恭儉仁厚略無土木聲色之娛而事例頻開弊政
亟行海內富庶視乾隆時迥不侔矣龔定菴餽餼謠云
父老一青錢餽餼如月圓兒童一青錢餽餼大如錢物
力盈虛可以想見伯蒼比部述聞一首如白頭宮女坐
說元宗後之制國用者不可不加意也詩云艱難益愁
思肅殺悲清商坐有四方客各各言故鄉事異而詞壹
人不飽粃糠有叟起長歎子也母感傷老夫少年日民
富風俗良忽忽八十年盛衰遂難詳昔者物力盛海內

歌豐穰金錢積大府米粟盈太倉力厚勢亦大功業成
非常武德震千古雄略開遐荒西拓三萬里永作我邊
疆堯舜所不臣周漢所不王莫不重譯來稽首朝明堂
賞賜累千萬道路遙相望雄關啟百粵南海波茫茫至
今風濤地珍異猶梯航老夫山野性榮利久相忘爲慕
都邑大北來亦自強九門闢白日列肆何洋洋車馬若
飛龍赫赫大道旁帝闈鬱佳氣萬戶遶建章離宮在西
北樓閣相輝煌湖山擅幽勝創造何皇皇虞書立典訓
巡狩察萬邦聖代重大道先師禮秩光乘輿謁闕里林
廟登馨香車駕遂南幸龍舟隱帆檣會稽覓禹穴萬國

集冠裳時平庶政理財裕萬象昌至尊顏色霽四海蒞
祿康子生亦已晚時勢不可量南都久大水繁盛今蒼
涼北土苦旱癘千里無益藏達官貴斗粟商賈羞空囊
四民日趨末本業荒農桑老夫幸白首餘生須壺漿願
足慮亦短望子憂其長寸心久懷舊感激動中腸自效
會有日憂思殊無方秋風從天至矯首看穹蒼

儀徵諸生潘宗藝詩學温李織錦詞云鐙火紅妝照翠
幃軸轡聲裏夜遲遲請看萬疊鴛鴦錦都是春蠶死後
絲杏花云平章故宅朱門改冷巷東風白日斜依舊春
衫騎馬過不堪重見出牆花詞意悽警可入唐人絕句

之選

高安朱瀚寅菴爲文端相國六世孫以騎都尉官副將
移居詩云餘篁生潦萃秋箭騁竿影書少忘屢涉雲孤
幕前永荒籬地無多放卷足萬境虛廚儉寒具句入槐
牙餅飽食助健誦援我汲古綆爾曹塵幘鬥此志長耿
耿頗似江西詩派右班中所僅見也

漢陽吳少白郡博長唐大別山拜魯子敬墓云眼識吳
公瑾心盟漢武侯紫髯終附魏遺恨魯山秋少白殉粵
匪之難世亦罕知之者

姚秋士爲人孤冷雋絮不與時俯仰詩慷慨任氣多幽

燕之聲以丙申進士官職方貧且困不得遷未中壽卒
寶劍篇云我有一寶劍其直千黃金黃金豈足珍所貴
志士心我生結客近十載知己悠悠竟何在刎頸終須
報信陵鼓刀暫可尋朱亥拔劍入燕市遇一俠少年遺
之青羔裘醉君斗十千雄談生指顧意氣高雲天自謂
獲所求心過金石堅孰意一朝閱中情相棄捐吁嗟乎
積風陰雨古所恥世事誰知盡如此摩挲寶劍還歸來
我今與爾同生死蒲萄酒歌云主人開筵意良厚勸嘗
西域蒲萄酒一曲伊州舞乍闌香螺傳送織織手寂寞
年華銷晚風幾回沈醉畫堂中不惜千金解狐白換將

暫時雙頰紅近體如寄王秀才二首云窮途昔共處尊
酒賴情親豈謂悲秋日兼成憶故人文章因病廢歲月
逐愁新但想他年約江南好卜鄰昔讀虞卿傳憐君愁
著書柴門閉秋雨余亦病相如橐筆千秋事彈琴四壁
虛可能湖海氣到此未銷除傷鄰翁云落葉一辭樹千
春無返期人生更奄忽榮落定何時宿昔共樽酒今朝
臨總帷黃墟有遺歎豈獨長年悲

秋士還初堂詞鈔一卷爲潘季玉所刻秋士出潘文恭
之門無私謁季玉固未之識也張仲遠亟稱於季玉訪
之已物化矣覓其所爲詞不可得既訪於承子久子久

訪於家簡侯方伯爲之參訂以付劄劄序稱其沈微悱
惻無世俗溫燮之態光緒戊戌鍾羲重校刊焉洞仙歌
懷舊詞八首自序云當前風物未必留連境後尋思皆
堪惆悵桑下三宿出世者尙爾移情柳大十圍感時者
覽之流涕哀樂之極愚知同懷而况飽仙餌於天台又
歸塵世阻長風於弱水更歷崎嶇者哉弒桐派本皖城
支分燕市懸弧越國負笈楚黔名勝之區一身徧歷行
李所逮萬里而遙凡所經過盡留夢寐架珊瑚於孝穆
亦解吟詩奪錦段於邱遲因而作賦人非楚產實同莊
鳥之吟境等窮途輒效阮公之哭其抑塞磊落之概亦

可悲矣介弟子連孝廉斌敏亦能詩夜過鄒縣云土壁
昏燈慘不紅又將殘夢逐尖風沈沙不動輪蹶穩明月
青山似洛中

道光庚子沈朗亭尙書視學關中有西涼新樂府四首
牧馬回云戰馬如雲散坳牧番騎遮要入山谷谷中首
積青茸茸我馬不食但躑躅長嘶卻走無留停痛著鞭
箠誓不復吾皇德意浹庶類馬食官芻如食祿急還故
廄立不動番人不敢窮追逐黃塵起處官兵來歌呼相
慶我馬回徙牧地云西涼營馬逐水草水草爭如番地
好番人一過馬羣空議移官廄暫避鋒自從移廄牧無

擾虜騎長驅入村堡迫逐牛羊等閒事一室妻孥詎相
保將士愛馬官愛民棄地招寇真苦辛村氓嗷嗷滿四
野自恨今生不爲馬夜圍村云虎狼何幸投陷阱暮據
山村負嶠猛防兵四集大合圍我軍勇健敵勢微寡謀
但恃火器利高踞屋山無一斃平明致死客作主深宵
轟擊真無補是何雄傑一將軍首犯通中死結纓自注謂守
備楊東有餘兵失勢爭竄伏敵人謾笑縱不逐留谷中云番
人出沒繇谷口出得牲牽歸恐後今年大掠滯不行阻
兵據險情可憎渴飲漚漿饑殺馬羶帳連雲彌大野我
兵持重懼勞師撤圍疾走愁倭遲豈知狐鼠尙竊伏我

歸則出無定時居民號哭遮大帥大帥頓兵卅里外尙
書以咸豐辛酉十月偕索綽絡文端公麟魁奉使甘肅
同治壬戌正月文端卒尙書攝陝甘總督勦辦撤回歸
至平番西山水暴至逐肩輿而沒諡文忠

道光辛丑英人犯浙江舟山失守王錫朋鄭國鴻葛雲
飛三總兵同日戰歿孔宥函用陶詠三良韻詩以哀之
云戰撫兩失馭外患誰實遺吁嗟大難端其來亦云微
舟山孤無援若爲地所私得失委三鎮遙策拱旌帷四
山合死力士氣無所虧碧血濺海水三忠同一歸舉世
競高論臨難覘從違武人耀國乘聞見今所希一一食

人祿念之中心悲寄語大將壇母輕短後衣王字樵慵
順天甯河人以壽春鎮守曉峰嶺鄭字雪堂湖南鳳凰
廳人以處州鎮壁竹山門葛字凌壺浙江山陰人以定
海鎮防半塘土城皆力戰殺賊過當以無救敗王諡剛
節鄭忠節葛壯節時粵東死事者關忠節天培陳將軍
聯升王寅寶山陣沒者陳忠愍化成聯升有馬黃驄爲
英人所獲飼之弗食銜轡之則蹶齧不已英人怒而憐
之乃獨棄之海濱荒島中好事者贖以歸繪圖徵詠而
張其事王定甫爲作義馬贊

鹿牀居士本休甯雙谿戴氏明末家於杭以鹽筴起家

有園亭池沼居城東獨被服儒素自名其齋曰習苦與
弟鄂士同死於忠其舒城道中書所見云飛鷗落牛背
牛行鷗不知負鷗上坡隴鷗驚繞牛麓隴右坐牧人濯
足千頃陂上有高樹蔭下有涼風吹仰天百無事信口
歌竹枝借問歌中語有意亡其詞歌竟騎牛去樹杪鷗
呼兒可謂詩中有畫

漢軍心農司馬誠意有句云野水漲痕添夜雨四山花
氣壓平湖

懷甯陳燮樓大令世鎔贈李介梧刺史云因官暫退成
詩業使客忘歸是主賢

陸芾庭聞泉云聽久轉幽寂泉聲在隔山小停咽危石
一折走谿灣天半風徧迴林閒客自閒水流如可枕我
欲出煙鬟魯通甫明月云明月非春水如何滿地流離
離出海嶠益益注金溝花露時翻鵲風江有去舟多愁
拚看汝扶影傍南樓皆詩之有清氣者昔翁覃溪閣學
詠物七言律詩偶記謂體物之篇系風雅之正脈非僅
侷也揣稱也迨其後題畫之餘益滋類目丹黃金碧皆
關抽祕之微矣若寫照行看子則往時但舉齋軒尙與
人地易相比切至於詩品語資漸工寫景於是題多藻
麗而形神義法兼到爲難以愚往復研求作者利弊則

凡題人寫照者不惟工於寫景必期愜當其人必期在
我之交誼親疏與見在之時地際遇或贈處之際喻申
忠孝之箴或勸懲之閒矢結韋弦之佩皆於寄興灼見
指歸而敘景之工切第於此中相依而出不止緣情綺
靡也是則六義之賦必合比興而通會之其於體物精
詣或庶幾焉今本其意取五言詠物之作就所記憶略
摘十餘首以資賞析曾庭聞隴夜聞擣衣二首云擊柝
孤城暮清砧絕塞愁夜深眠不穩衣綻補何由星月延
三輔魚龍混九秋忽傳消息異大帥下蠻陬遼水歸無
計隴山別又多盛年不相待秋色夜如何築室巢鸚鵡

圈田豢駱駝中原望吳越回首泣西河顧甯人一雁云
一雁度汾河河邊積雪多水枯清澗曲風落介山柯塞
上愁書信人閒畏網羅覆車方有粟飲啄意如何陳元
孝螺杯云汝曲世所棄因之成巨觴縱逢千日酒不忘
九迴腸江海歸何益朋儔興每長誰能賦鸚鵡名字恐
相妨鎮紙云刀錐皆見末汝鈍類模稜及與飄風會方
多鎮物稱卷舒勞重寄著作得良朋自古安劉者都無
文學能金壽門東岡之下老屋三楹陳文貞公讀書處
也予嘗游憩其閒懷企有作云秋氣斂虛館東岡生道
心林疏風脫翠山暗雨添陰既有出林磬復多遵渚禽

六時喧寂意欲繼謝公吟鴈太鴻雨中金鐙花云盡日
淒涼雨叢花照素秋碧檠看最瘦紅豔欲俱流有淚長
門夜無人小院幽更憐湖畔路翠燭冷颼颼錢稼軒蛩
云商聲不在樹空砌結秋心久客苦長漏騷人愛短吟
并添四壁靜獨對一鐙深復有清礎和能無白髮侵李
虹舟曉月云客行易衰白寒苦驗清輝明月幾回缺關
山人未歸天高河影斷夢覺曉霜飛霧樹猶相引勞歌
愴式微錢坤一藥曰云釜釜鉞檠外虛中百味并奚煩
占小過合與號長生夜色丹房靜秋空玉杵聲刀圭難
草創賴汝力經營同人法源寺分詠得海棠云花卽扉

頻叩春曾句幾傳佛香深與染人意老爲顛碧蘚齊鋪
院高槐半冪煙如何禁愛惜落片到闌前朱筠園落日
云落日氣沈沈千峰變夕陰懸鐙孤閣迴急雨萬松深
幽冀空迴首乾坤賴苦吟飄蕭餘短髮何事不勝簪張
度西焦谿曉雪云惡嶺逼寒雪征橈攪曉眠亂杉低墮
水孤店寂生煙夢破還家日春驚作客年何如狂賈島
只欲祭詩篇馬斃瘞之口占云炎風山石碎一蹶豈周
防已分從人後甯甘棄道傍敝帷聊汝覆春草爲誰長
說與千金骨燕臺價正良黃漢鏞新月云乍見是將落
愁心不可論陰陰當鏡閣慘慘挂關門光弱如新病天

長有斷魂相看兩幽絕一角遠山痕芾庭通甫二詩亦
其亞也

徐鐵孫工詩喜吟詠懷古田舍詩鈔紀行諸作最爲奇
崛拗嶺云積翠遠成嶺瞻高近無路蟻穿方右旋螺盤
忽左顧層冰慘不春亭午凍猶沍倚天石僵立拂地雲
暗度谿深下聞聲竹密上防露三休惜兩屐一讓枉百
步平生與世拗茲行若予悟江湖胡不歸戎馬正多故
淨居灘云灘淺不容剗勢乃五里寬眾流滙淨居陡落
百尺潭我舟暫隨之篷背花漫漫舟輕水不受仍出隨
驚湍色然坐四顧再覩天日乾未覺幘顏溼但怪裘茸

寒人生有坦途胡不從橋安釣魚灘云我疑造物久流
水幾時歇每聞遠灘聲常恐元氣竭誰言釣魚嶺攔江
插簪峯居然識此意蓄怒無使泄松谿導閩浦雷電峭
奔掣東流忽西折千里誤一蹶卻行吾敢愁維險天所
設楊柳灘云清灘轉斜日古峰迴驚濤高柳數十株當
春散輕縑鵝黃醮屋瓦鸚綠縈漁篙惜汝名字好笑人
行役勞今來與昔往歲月何滔滔不悲歲月徂所嗟太
白高且留華山馬莫賣渤海刀甘言載毒算反復防此

曹

鐵孫先世監利人隸漢軍駐防廣州與樊封昆吾陳良

玉脰山皆學海堂高材生昆吾著有論語注商讀孟稽
疑鐵孫著有大戴禮補注盛有才譽癸未試十壺詩受
知於阮伯元相國人稱爲徐十壺作令浙中幾十年以
清惠著累遷玉環廳同知紹興府知府調守杭州咸豐
三年勦匪徽州復東流建德二縣五年擢福建汀漳龍
道未行殉難黜縣以正三品賜卹予世職五古而外七
言如南山師邀食羅浮筍云籜龍何年避斤斧走入深
山避暗虎豈知道人不汝赦日日長鑿恣輕侮竹麕狂
呼救不得錦綉遠寄森可數居然童稚已耿介頓覺腥
生污鼎俎貓頭玉版等兒戲沙箸篋管眞市脯摩挲雨

暗土痕肥澁勒煙寒村味苦多生蠹簡有餘嗜填塹餘
雄今可賈卻愁半夜雷雨急芒角槎牙生肺腑應須火
急吐新詩憑誰題向蓬萊股奇矯橫絕之氣拂拂行閒
文達以詩縣令推之非虛語也精隸書善寫梅取趙子
固詩所傳正統諒末節舍此的傳皆僞耳之語撰爲梅
統按代相承略區氣類壬子六月刻於越州以生於乾
隆壬子自署曰壬子人亦方爾止四壬子之意子同善
公可能世其學有花影彈雀詞

番禺黃蓉石比部刻黃香石張南山及譚康侯敬昭三
家詩自作口容攝山房詩鈔讀赤雅云流落人閒氣未

摧甘心蛇石事堪哀無家張儉褰裳去有恨靈均繭足
來絕徼已拚埋照老諸蠻留重著書才舊藏法物飄零
盡太息庚寅綠綺臺吳縣吳清如嘉佺司空表聖故里
云避世能師鄭子眞王官谷裏寄吟身久爲闕下抽簪
客重見階前墜笏人天祐祚衰無節士中條山峻有遺
民此生不與清流禍終古茅亭歲月新每讀二詩輒爲

神往

蒼梧李明農治卿詩鈔瀋陽東山作云麝臍香在草虎
眼夜如鐙造句甚新

江迴帆飛小天空鳥下遲梅蘊生游平山堂句也蘊生

江都舉人年十二能爲古近體詩近體宗少陵古體則
導源康樂二十學駢麗之文宗江鮑而參以徐庾哀艷
工書善琴而所嗜尤在詩所著曰嵇菴集詩六卷續集
四卷文二卷嵇菴者舊居鼓琴處以家難離去嘗繪嵇
菴圖漢軍李裴叔讀嵇菴詩云我悔當年識瘦容不將
琴韻悟仙蹤但令指下傳中散誰信尊前有嗣宗勁翮
盤摩峰上鶻遠音搖曳月明鐘霜宵欲證源流事寂寞
江干咽冷蛩同時甘泉辭子韻傳均亦勤學攻苦於百
憂中手不釋卷尤精小學謂金壇段氏時雜臆說嘉定
錢氏較精審大錢文集內有說文答問一卷深明通轉

假借之義博引經史以證之成說文答問疏證六卷又
以文選中多古字條舉件繫疏通證明爲文選古字通
疏證一書嘗就陳石士福建學幕有閩游草登獅子樓
云高樓百尺峙南天旅望春初景物妍山列翠屏深霧
裏江開金鎖夕陽邊越王宮殿餘衰草素女祠堂冷暮
煙未必白龍猶可釣長竿空擬獨投淵

寶應劉端臨治漢學弟秋槎典簿履恂星槎司馬台斗
秋槎子楚楨楚楨子叔俛仍世傳經楚楨與儀徵劉孟
瞻齊名稱揚州二劉以庚子進士歷宰直隸之文安元
氏三河勤於聽訟文安地故窪下伏秋水溢爲民害修

隄堰以濟災令三河時值東省官過境故事兵車皆出
里下楚楨以兵多差重非所堪遣往通州雇車應差給
以民價空車減半民得不擾孔宥函詩四十始釋褐作
吏無能工君豈真拙哉時不珍黃龔佐民貸府庫慈惠
寡所同嘗病論語皇邢疏蕪陋蒐輯漢儒舊說益以近
世諸家及宋人長義爲論語正義子叔俛卒成之孟瞻
精研古籍於左氏致力尤勤爲左傳義疏子毓崧孫壽
曾相繼賡續僅至襄公本朝羣經疏義皆有完書獨左
氏學三世一經未能畢業亦一憾事也

葉潤臣閣讀在都聞覃谿先生之曾孫女溷跡市中貧

無以度引爲己女擇名門子嫁之著敦夙好齋詩集民
事一首紀戊申巳酉閒湖北大水作王子壽悼潤臣詩
有引被哀家禍含悽出九門之句謂其兄崑臣也湖北
詩人同時有天門劉澹孝長嘉慶閒西巡五臺嘗詣行
在所獻詩五百韻與時輩論詩獨心折大竹王大令魯
之遵義唐子方梓其集王子壽稱其才氣似牧之同甫
郴州陳筠心考功起詩句云懸瀑無曲陂苦槩無甘枝
極近東野

雪橋詩話卷十一